



‘ŌRERO A TE MANATŪ MONO

Mahana pae 29 nō tetepa 2023

31^{ra}a Fa’a’ite’itera’a Nō Te Fāri’ira’a Manihini

E te mau tuahine, e te mau tu’āne,

E te feiā fāri’i manihini,

’O ’outou i tae mai,

’Ia ora na, Ka’oha, ’Enā koutou, ’Aroga !

Tē ’oa’oa nei au i te ti’a atu i mua ia ’outou i teie mahana nō te ’āvari i te 31^{ra}a o te fa’a’ite’itera’a nō te fāri’ira’a manihini ’o tē tupu mai te 29 nō tetepa ’e tae atu i te mahana mātāmua nō ’ātopa i nī’a i te tahua nō Māma’o nei.

E fārereira’a mātaro-maita’i-hia ’e ’ape-’ore-hia i te fenua nei, nō te mau fāna’o rahi e vai ra i te pae ānei o te mau tārifā nō te mau nohora’a, te mau utara’a, ’e o te mau māta’ita’ira’a rau tā te mau manihini e fāna’o.

’A ha’amana’o mai na tātou i te tumu i tupu ai teie nei fa’anahora’a. ’Ua ’itehia na ē, rave rahi o tō tātou mau anotupu e reva na nā te ara, i Las Vegas, i Los Angeles, i Aotearoa, ’ei reira e vaiho atu ai i tā rātou moni.

E tuha’a moni rahi tā te mau anotupu i ha’amāu’a nā te ara, tā tō tātou fenua i ’ere nō tō tātou ihiihi. I te matahiti 2019, ’ua hau i te 50 miriā tā te Mā’ohi i ha’amāu’a i te ara. Tē ’ite mai ra ’outou i teie fāito moni, ’ahiri pa’i i fa’afāna’o i tō tātou fenua ! ’Ua tupu rā te reira hou te ma’i Tōvī.

Teie fa’anahora’a nei, e fāna’ora’a ia nā tātou, nō te mau anotupu i te mea ē, e tārifā i ha’amāmāhia nō te māta’ita’i i tō tātou nei mau fenua ’e te ruperupe ’e te ’ā’ano ’e, nō te fa’afāna’o ato’a i tō tātou nei mau ’utuāfare fāri’i manihini, tō tātou feiā fa’aorihāere ’e tā tātou ato’a mau taiete utara’a manihini.

Māuruuru i tō tātou fārereira’a, ’e ’ia fāna’o maita’i tātou i teie nei fa’anahora’a.